

ORIOLE  
CIBOLE  
KOGUI  
BAMANA  
YUKPA  
WAYUNAKI  
ACHAGUA  
ROMANÍ  
ETI ENAKA  
KINOLA NI DALINGI  
BARÍ  
TULE KICHWA  
WOUNÁN U'WA  
EMBERA HITNÚ CUIBA  
TATUYO TINIGUA PIAROASIKUANI  
ÑENGATÚ GUAYABERO SIRIANO SÁLIBA  
ACHAGUA  
CARAPANA PUINAVE PIAPOCO  
EDUÚRIA TARIANO CARIJONA KURRIPAKO  
NAMTRIK WANANO TUYUCA KUBEO BARÁ  
YANA CONA NASAYUWE DESANO PISAMIRA  
INGA PIRATAPUYO YURUTÍ BARASANO  
AWA PIT. UITOTO TUKANO MAKUNA  
TAMANO  
CABIYARÍ COBOLAJE KAMENTSÁ KAKUA YUHUP  
COFÁN SIONA MIRAÑA  
TANIMUKA ANDOQUE  
COCAMA NONUYA  
MUIANANE OCAINA  
TIKUNA  
BORA  
YAGUA



YUCUNA

# Acuerdo Final para la Terminación del Conflicto Armado

Una publicación de  
**La Oficina del Alto  
Comisionado para la Paz**  
y traducida por  
**MinCultura**

**KAMEJÉYA PURA'ÁKALO YUKUNA MARÍ**

**COMISION ETNICA PARA LA PAZ Y DEFENSA DE LOS DERECHOS  
TERRITORIALES**

*Tapuiyana puráka'alo mekeca ina i'imaka lojé, pala penaje eja'awachu*

*Penaje*

**LA HABANA CUBA**

*Leru kerine 24 eyá 2016*

**CHÚA TAPUIYANA WATA MEKEKA WE'ÉMAKANA YURIKO  
EJA'AWÀ PI'IRENA WA'ATHÉ (FARC)**

*Chúa we'emajika riyukuna we'emakana kecha eja'awa pi'irena wa'athé mekeca wayuriko we'emakaloje palapenaje.*

*Phiyukeja pajimila nakuá eyá kamu'uji la'akañó wa'athé, nakupá kariwana na the'eré nakiá tapuiyana ñakekaja eyá naña'atá na liyá phiyuque nanani kaje; eyá naña'a nañatho tapuiyana kariwana yaní na the'emú au, jupimi rikeñ'oo i'imaka uncá meyalemi kale marfkaje i'imakale we'emakana pura'ó rinacojé we'emakaloje penaje eyá eja'awá pi'irena i'inataño na pechua re nakaje yuriko phiyukeja na pechu nakú the'eri yuku, a'anejí, yaleji, phiyukeja tapuiyana pechu nakú.*

*Jupi'ichumi mekeca ne'emacá jupimi, mari kajé i'imakale unká wawatala chuwa kamu'ují wala'akana pajímila e'eyowa i'imakaño wa'ajini liñeru keja'akana; ñakepi we'emaká jupimi mari kajé i'imakale kariwana pura'ño rinaku.*

*We'emaká lojé pala penaje eyá na'aka lojé waña'thé wawataka palá i'imakaje.*



**Acuerdo  
de  
Paz**

## MA'AREYA RI KEÑO'O

E naya'akoja ne'enata na pechua marikaje nakú we'emakaloje jupi palá, phiyukeja wathe'eré nakua. Wephakaloje pha'pichaka penaje kariwana wa'athé tapuiyana kaje wa'athé, unka nenokakoloje ñake penaje. Eyá caphí napura'ako ne'emakana ja'apiyá pha'luaja ina'aruké wátari na'aka loje liñeru ri'illó phiyukeja wa'aló nakaje nakoje; paalá cariwana ya'ani i'imakaño pura'año phiyukeja mekeka ina iphaka inaana ja'api napur'ao kaja. Ya'anajena kariwana kemaño mekeka ina iphaka pha'apichacá inaru'uké wa'athé, unká ina kemalá chua marita kameni marita tapuiya marikaje we'ema rejeno wani weka eja'awachu

Eyá aapú nema, tapuiyana i'imakaloje mana'eja nate'ere nakuà penaje ne'emakaloje mana'eja penaje.

Unká na cawila'ala nanaku eya ne'amacana pu'urarò eja'awá pi'irena wa'athé ne'emakaloje pa'awatechaca mane'eja eyá 'napura'aò pawa'ate'echaka kachùaja nakù nalama'ataje pura'akaloje tapuiyana wha'atè; ne'emakaloje mana'aeja penaje eya tapuiyana pu'uraño nekamica nawa'aka'araka pekówaka, nakapichataka piyà nayale naya'ata riká najapakaloje ne'emakaloje ripalamani.

Ma'are wakeño'ó apù yukuna la'akaná pu'ukuni penaje

È achiñana kecha ina'ana tapuiyana kameruna eya tapuiyana kameruna the'eré i'i àfrica eyajena nekhà marowá kariwana e'iyowa.

È nena'athá napechùa nanaku na'alakaloje nañacarò penaje a'o we'amacana pura'o e'ejawà pi'irena wa'athé na'alakà piyà chapu ne'ekà na'ate'erè nakù nañakajela ewà.

Ke'ewaka ripura'akalo je'emakana i'imajè

Eya we'emakana inatá ripechua tapuiyana palamani ka'arù na'apechu naku ya'aleje, pu'urakajo, ma'arikajè a'ù uncà meño'ojò ri'ipalala kaja wa'awepí mekeka tapuiyana pe'echu nakù nakaje keño'ò e'ejachu ima'akà.



Acuerdo  
de  
Paz

Kaja napalamani wa'awepi nakaje naliyà na'apurakalo kaje ,ma'arikaje i'imakale me'etenì we'ekà a'achiñana ina'ana rèjeno wani wekà kariwana ña'akèkaja wa'ajapakaløjè pa'añakani, ne'ephaka piyà tapuiyana'i na'apiwà.

Ma'arikajè a'aù we'emakà rèjenowani we'ekà we'epiri tapuiyana mekeka we'emakana pa'atàjika wa'atherè walò ke'elè eja'awà pi'irena ka'akare i'imaxá waliya.

### **PHIYUKEJA WA'ATHÉ PECHUJI WE'EPIKANA**

Ekaja we'emaka la'a haphí mekeke rinakoje mekeke kaphí tapuiyana pechu i'imakaløjé ripura'akalo nakoje: marí kajé au riwarua'a loje kaphí we'emarena choje na'amaka loje wachaya penaje. E kaja we'emakaløje mana'eja wathe'ere nakú wapura'kalo ja'apiya.

Kajachaka kapiyako eja'awá pi'irena pacha e we'emakana lama'ata liñeru riwarua'aka loje the'ri penaje; ne'eyajena kariwana lo kecha tapui'ayana lo marí i'imakele ri'ipura'ao phiyukeja nakaje nakú japakaje nakoje jema pirakana, pají, ijí kaje, marí kele au naña'aka loje na'lua nakaje.

Palamani ne'emaje maríka kale nakoje we'emakana pura'o, the'eri nakoje mekeka ripa'ataka loje na'jlo te'erí, paminanjlo penaje re kaja nale'eje rinakoje papera mekajeka neká paminana; eyá najapaka loje pala rinaku reyá marí palamani ne'emaje najapaka pala, eyá namaje pala nathe'eré nala'aka piyá nawatakake riká

Najapaka piya kamu kamare nakú, marí kaje apichatari eja'awa kamejeri uncá nokana i'imalá karú, meke i'imajika e wawakajo we'emakana wa'athé wemaká ri'ijlo marí palani ella marí unka paala.

### **MEKEKA PURA'AKA'ALOJE**

inapura'ao pala mekeka we'emajika pala tapuiyana i'ikana pura'akó loje riwa'atejena chaya wawe'epikaløje merejchaka weka.



Eya wamaje mekajena neká mu'ujluka'ajeño na pura'aco loje tapuiyana chaya penaje phiyuke.

### **MEKE INA E'EMAKA LOJÉ PALA**

Tapuiyana wakara'ari nanakiyana rijapakaloje ramataka loje rile'ejena ina'aruké piro'okejina liyá.

Tapuiyana kameruna awakaño na pura'ako loje nachayo penaje marí kaje i'imakele na'a na'arumaka ke'eyape na we'epika loje neka penaje ree kaja na lekare name'eñatajona.

### **MEKE INA LA'ATAKA PURA'ALOJI IPATÚ NAKOJÉ**

We'emakana amajeri tapuiyana ñakajela nakuwá reka'ana ripura'o nakú jema'akana nakú. Unká ipatú nakú japakana i'imalá ka'arú rejatakana unka i'imalá wejapaja pají wake'ena, ewa'a mana la'jona, yuruku mana la'jona, keyajupaka kaje mana la'ajona, lawichula'aruna a'aka lojé ripechu eja'awa minanajlo.

Unka chió we'emakana pura'ao eja'awa pi'irena wa'athé unká nepake tapuiyana ja'api nephake au nawa'a nañató tapuiyana yani kechami naka'aka loje nathe'ere na liyá penaje rejomi nejataka loje ipatú penaje.

E kaja nawarua'a rau, ajopana kariwana wa'athé marí kajé au naña'a liñeru na'jluwa. Unká tapuiyana na'ala nanakojo, mekeka neká eyá Colombia te'eré nakú unka meño'ojo ipatú ejataka i'imalá.

Eyá apu eja'awa pi'irena ja'ake surarana nojona the'erí e'eyaje tapuiyana na kuá nenoka loje surarana penaje eyá namaka neno ewa nenoke tapuiyana kariwana kajena chira'año rewa eya apu nalekare na'apatakare noke napirana na paji kajemaka marí kaje we'emakano kechami eja'awa pi'irena pura'año pawa'atechaka unka paala ina la'aka chapu phekowaka marí kaje au nata'anata rika, we'emakana kecha eja'awa pi'irena yuriño me'eteni na'aka loje kiñaja Embera, Wango Antioquia, San José del Guaviare, Nukak ñakajela ii Mapiripan, Meta the'ere naka eyá apu kameruna tapuiyana Tumaco Nariño eyajena tapuiyana apu Cauca eyajena tapuiyana. We'emakana eya eja'awa pi'irena tapuiyana i'imakana



**Acuerdo  
de  
Paz**

pura'año pawa'techaka napa'ataka loje tapuiyana te'eré penaje, kiñaja tapuiyana nei Nukak Emberas Katios yenojo eyajena te'erí ka'ana eyaje maríkele rii yenuwa waka'ako eya.

### **MEKEKA LA'AKANO LEKAJERI MEKAJENA YURIÑO KEWAKA THAKA'AÑO PIMICHIO**

Maríke pura'ka'aloje kemaka ke 246 napechu nakuke tapuiyana i'imakana kemakake nawaka'ara'a pekowaka najapaka loje nathe'ere e'eyowa mekeka napechu nakuke ne'emaka piya we'emaka pura'aka'alo jiwa.

Eyá napura'ao mekeka ina i'imaka loje pala penaje pu'uwaka, eyá keele jupimi aja'awa pi'irena wa'akaje ne'eyajo i'imaka namaka piya uwi eya phekowaka i'imaka piyá.

Marí kajena we'emakana a'ajeñathé newiña'ata loje penaje ra'aje na ñate liyeru au napa'ako loje jupimi i'imaka ke penaje.

Unka naku jema'akana i'imala na penaje kajita kaja inawi'ike rika ri'ijlua phiyukeja inaana walijimakana, yuaná, ñakejakaja ina amakaloje neka pala.

### **CHÚA WAMAJIKA MEKEKA WE'EMAKANA A'AKA LOJE WANAKOJE RIKA**

Marí kaje i'imakale we'emakana kecha eja'wa pi'irena kema namaka loje pala kele nala'akare i'imaka tapuiyana i'imakana kameruna i'imana nemaka loje, nawakajiko, ejechami meka nemaka merejeka we'emakana a'a liyeru ina'uke awakakoloje mekaje liñeru nakia riña'a apu nawakako loje.

Marí ke na pura'ackó kaja penaje i'imaká we'emakana kecha eja'awa pi'irena wa'te nayuro wa'até 297 papera pano'othákeja riphata phajluaja te'ela kele (5) tapuiyana nakoje.



## **NAKA WAPURI'ICHO NAKU IPHAJE PHIÑO**

Marí papera chu yuriko mekeka napura'ako i'imaka nawakako i'imaka we'emana kecha eja'awa pi'irena wate Abana cuba e. eyá napura'aco kaphi phajlua kua'ata kele ne'emakana jupi'ichumi yucuna rikáwani naku.

Napura'ao kaphi we'emakana kecha eja'awa pi'irena wate mekeka we'emaka loje pala jupi eja'awa chu.

### **Punto 1**

## **CHUA WE'ENAJIKA PALAMATANI CHUÁ**

Marí kulari ja'ari japakake ne'emaka loje pala penaje, phiyukeja cha'apa i'imakaño inau'ke nañakajela ewa i'imakaño, nakapela ewa i'imakaño, marí kaje naku ne'emakana loje penaje napa'ko piyá nayamojo nenokako piya pawa'atechaka Colombia eeyá.

Marí puraka'aloje rika a'ri phiyukeja inau'ke ñathe kariwana japajeño eya tapuiyana chua we'emakana a'aje rithe'múa surarana au; tapuiyana ñakajela ewa, ne'emakaloje pala penaje nawakako phajlua'chu penaje neka'ana wa'ate.

Ne'emaka loje nakaje la'akana a'aneji ejátakana kamu'uji i'imakale nawakara'a e rinakiya pajimila ejo; marí kaje i'imakale phiyuke wamaje eja'awa wa'ajlua penaje.

We'emakana kemari, wala'aka loje pala a'aneji phiyukeja inau'ke piyaña karinnakojeja ñake.

Kaja ñake rinaku kemakana tapuiyana we'epiri pala mekeka marí kaje nakoje.

Na palamani kaja wawe'epi mekeka ina i'imakaloje pala jupi, rikata we'epiri phiyukeja pajimila ewa pamineko rika ya'atari na'jlo pamineko nakaje la'akana kiile lekareji minana waté ka'amuji la'akaño e unka i'imala yuana jewiña'ata e liñeru nephata apu ewa.



**Acuerdo  
de  
Paz**

## **INA MU'JLUKA'A EJA'WA E'EYAJE INA WE'EPI MEKE RINAKU JAPAKAJE**

We'emakana keño'otari liñeru nakoje pura'akano rekaja the'eri nakoje rejomi ritama'ataje riká mapeja kamu'iji la'akaño the'eri nakujlo unka le'eje pala the'eri i'imalá, ra'aje pha'jluaja weji kele millones le'eje kele thé'eri iyamathe'ela kele (10) jarechi maríke namajika the'eri pala. Maríke i'imakale ra'aje the'eri kele jupimi naka'akare naliya i'imaka, nejatakaloje ipatú ejomi najapa rinaku eyá apu ne'ekaka eja'wa iwami marí yuriro we'emakana ajé kayaniruna'jlo, unka le'eje the'eri i'imala kamu'uji la'akaño liñeru nakujlo.

We'emakana pura'ajo liñeru ñakarelana jua'ate na'aka loje kayaniruna ñathé nawarua'aka loje pirajina rekaja palá rama'jlo weka pala eja'awa ñathé iyama cua'ta kele the'eri.

Eyá achiñana inaana kaja we'epikaño japakaje pala eja'awa naku, a'ajeño inaana pajimila naku i'imakaño na'aje phamineco inaana kayaniruna ñathé eyakele.

Na ka'akárena na ñañajela eyá i'imakaño we'emakana a'aje wañathé liñeru au mekeka wajapaka loje th'eri naku nawarua'aka loje pajii iji penaje, ella nalama'takaloje ñakare yuana jewiña'ako loje nañakare, apu pañathéchaka a'aneji nakú.

## **PHIYUKEJA JAPAKAKE KARIWANAJLO**

Nala'aje japakaji phiyukeja iyama the'elakele jarechi (10 años) kamu'uji la'akana wa'ajini ta'anajo. We'emaka loje rejenowani penaje phiyukeja kameruna tapuiyana jareruna kele. We'emakana a'ajekaja waña'the kera'atani i'imaka loje wañakarechu penaje, maquina (medios de comunicación) wapura'ako choje penaje eyá apu pechu'wa rilama'acoloje puini pajjicha ripi'irena noka piya riká.

We'emakana a'aje wañathé pujana au, pala i'imaka loje penaje. Yuana jewiña'akajole penaje, ñakareji, au juni kaje, au palani juni japakaje i'imaka loje penaje phiyukeja inau'kejlo kariwana jlo tapuiyanajlo.



**Acuerdo  
de  
Paz**



**JAPAKAJI PALA INA I'IMAKALOJE PENAJE REJENO INA  
I'IMAKALOJE PAJIMILA EWÁ I'IMAKAÑO KE KAJA**

*We'emakana wakara'ajeri inau'ke newiña'atakaloje inau'ke meke ina japaka rinacu, ina waja'atoko piya phiyukeja pajimila nakuwa ñakeja kaja tapuiyana ewa ñakeja.*

*Na we'epika loje mekeka ina a'aka nayani a'ané penaje naco'co piya, ne'emaka piyá, naphi'ra e'eya e mapi'raruna.*

**Punto 2**

**PHIYUKEJA PURAKA'ALOJI INA I'IMAKALOJE PALA**

*We'emakana kechami eja'awa pi'irena marike na yurico pajimila nakuá, inau'ke nañakajela ewá. Réjenowani weká wajapakaloje kariwana puraka'alo naku rejeno, wawatara'akaloje phekowaka rejeno wale'eje inau'kena kulájeño mekajenaka japajeño wachaya pura'ajeño kariguana wa'thé, palani karí neka puraka'aloje wachaya. We'epiri kariwana wa'té pur'akajo: Inau'ké ñathé a'akaná.*

*Maríkaje pura'akajo palani japakaji riká ina we'epikake ina japaka ina pha'lákapiya inau'ke wa'thé phiyukeja kariwana pura'ako nale'ejena palani.*

**PUNTO 3**

**WEJIKELE KAJA NOKAKAJO TA'ANÓ**

**NAPURA'O MEKEKA UNKÁ JIYÁ MAJA'AKAKANA I'IMALAJE  
SURARANA EYÁ EJA'AWÁ PI'IRENA NAYUIKALÓJÉ LEKAREJI**

*Napura'ó pawa'atechaca kewakaje mekeka natanhájika nókakajo surarana wa'athé kechami policia wa'athé kechami i'inarukè*



**Acuerdo  
de  
Paz**

ña'akana nathe'eré eyá nokakajota pachá napura'o mekeka nayureje nalekare najecaja rhená mechaka nayuríjica riká, napa'acó lojé napumichuá júpimi ne'emakake wekákekaja Colombia ké.

ONU ta ña'ajerí naliyá kele lekareji. Eja'awá pi'irena liyá rimakalojé mekeka jupimi napa'ataka jiyá eja'awá pi'irena i'imaká mari ke riyuriko 7 capítulo eyá pajluaja i'inaruké ña'arí paluate'ela kele 25 protocolos marí ke riyuriko ri'imakalojé richuá eyá 180 kekala.

Ri'inacojé i'imajé marí kele 35 palá nojé mekeleka napura'ó nakú piyukeja rikawani kewá, namakalojé ri'iwepicana.

### **INÁ AMAKALAJÉ EKA RICHUWANO RIYURIKO**

We'emakana, ONU, kecha e'ejawá pi'irena pechu nakú ca'aphí ñaké riyurico lojé meka napura'acalo yuriko papera chú kewakaje we'emakana la'arí caphí ripechúa eja'awá pi'irena iphaka ená meka lekarejé patakana eje amarí meka lekareji patakana riká i'i rika we'epiri amarí mekeka pura'acaloji naka yuriko Colombia e'eyayá unká watala marí kajeta amakana nopo'okalojé jupimi nemakake penaje we'ekakeja.

### **EJA'AWÁ PI'IRENA PA'AÑÓ NAPUMICHUWÁ JUPIMI NEMAKAKE MEKA PALANI AÚ.**

Eja'awá pi'irena yurijika nalekare mekekana nemajika reyá, nemajé reyá wekákekaja Colombianano ké.

É ne'eyájena pa'ajeño nañakaré ejo achiñana, inaána kajena, kele ina'año jupimi ne'eyajé palani aú natthemú aú. Recaja yuwaná nawa'akaja ne'eyajó i'imaká pa'año kaja nañakaré ejo i'imaká eiyona'aje( ICBF) ríí riká amary neká ra'a nañathé ne'emakalojé pala penaje, me'etení wekake rejomi we'emakana napa'tajica é rimaka'arajé neka nate'eré ejo neka'ana ejo.

Kele achiñana, i'imaño eja'awá pi'irena e'eyá mulukaje'eño política nala'ajé kaphí pura'akalojé kemakana najapaka kariwana wa'thé



naleje'ena ina'arukena palamani ne'emajé napura'akó lojé ina'aruke  
chaya.

Nathe'eré nakuá we'emakana a'ajé newiña'ako lojé penaje.

Kariwana pura'akalo jema'aka eyá surarana neká i'imajeño mekeka  
inau'uké nojeño tanátakana. Unká eja'awá pi'irena kalé ajópanata  
neka queja'año liñeru inau'uké liyá; nañata neká rejomi nañurí neka  
kaja ja'apaño unká ina japalare nakú nakarí ipatú kele rejomi  
nawa'akara ri'iká apú pijimila ejo marí kajé aú naña'a najlúa liñeru.

We'emakana a'ajé rinakojó meka namakalojé neka'ana penaje  
nanani kaje wa'athé piyukeja namakalojé ina'aruké a'año nañathé  
najapakalojé.

Nawaca'arajika surarana, kechami policiana kajena nate'eré ejo,  
neká amakaloje piyukeja inaru'uké. Apala meke nala'á neká rewá  
namakalojé ré inaru'uké japaño, apala meke nala'a neká. Apala  
nala'a nekó surarana ke kaja.

Marí ke ri'imaká piyá é kachúa nakú rikeño'o jupimi ri'imakake.

#### Punto 4

##### **MEKEKA PURA'AKALAJI LAMARA'ATAKANA**

Eja'awá pi'irena pura'año we'emakana wa'thé natanátakalojé ipatú  
nakú japakana.

Unká palani kalé riká karú kapichataka palá iná ima'akare, nejataka  
ré chú ipatu i'imaká e'eyonaja we'emakana pa'atari ri'icá ra'akaloje  
unká le'ejé the'erí i'imalajló.

Nejatakalojé na'anevá penaje, parikajé, parukaje, eyá phiyukeja,  
we'emakana wakacara'aje inaru'uké we'epiño mewaka lekareji  
eja'awá pi'irena ja'año i'imaká.

We'emakana a'ajé kaja ipatu wijo'ojeño i'imaká nalamara'ataka  
neká napa'akó lojé palá jupimi ne'emakake peyawéruna mana'aja  
rejomi na'acalojé na'achiná ña'até penaje neká a'ajeño nañathé.



## Punto 5

### **NAPURA'Ó MEKELE TAKA'AÑÓ I'IMAKÁ**

*We'emakana kemary ra'akalójé naña'thé mekajenaka la'año chapuwani i'imaká lekareji minaná pachá; napachá nala'a kamu'uji*

*Eyá nawajaje mekajenaká a'año ewa'awa pi'irena ña'thé i'imaká. Inau'ké wa'akana nakú, yuwaná wa'acana nakú, rejomi nenokako lojé penaje achiñana eyá inaána keke, eyá mekajenaká inau'ké i'imaño eja'awá pi'irena wa'athé kemaño nawatakakeja nuká i'imary nawa'athé uncá meke ri'inakoje i'imalá. Eyo'onaja nawajá wejapaja palua'atela keke a'arechí(5) eyá wejikele kua'ata keke jarechí (8) eyá unkájiké ne'ema riyukuna é nawajaje neka 15 eyá 20 jarechí.*

*Eyá chapukaje i'imaká nawa'a ina'aruké natemú aú naña'ata neká uncá we'emakana pura'acalo uncá na'alá nanakojó neyajena unká pa'alaño nañakare ejo, ina'ana nakú nakatako nawatakaké, yuwaná la'año chapu we'epiri marí caké nakojé we'emakana Colombia le'ejé kechami ONU, CURANA I'IMAKANA ÍÍ PAPA FRANCISCO EYÁ APÚ.*

*Eyá kaja napura'akaro nakú we'emakana eyá eja'awá pi'irena unká meño'ojó napa'aló nayámojo kaja napura'akaro ñaké ri'imakalójé penaje.*

*Kaja unká nokakajo i'imalaje mary Colombia e'eyá, eyá i'imaño eja'awá pi'irena e'eyá napumí chió jupimi ne'emakake nephakalójé pha'apichaka penaje najapakalójé palá inau'ké wa'athé we'emakalójé rejenowani inau'ké wa'athé penaje.*

## Punto 6

### **MEKEKA INA LA'AKA RICHUWANO**

*Ri'imakaloje richuwá inawe'epikaka anapura'ako we'emakana kechami eja'awa pi'irena wa'the e kaja ina we'epi reyá.*



**Acuerdo  
de  
Paz**

## **INAU'KÉ JAPAÑO PURA'AKAJO NACÚ WE'EPIÑO MEKA INA I'IMAKA RA'APIYÁ**

*Inau'ke we'epiño meka nõkakajo thanátakana japaño marí kaje nakú, neká japajeño Bogotá e, maríkele neká phaluaja kua'takele (6) wejikele (3) we'emakana le'ejé leya apú wejikele (3) eja'awa pi'irena le'ejé.*

*Maríke najapajika nenokako piyá, surarana eyá eja'a pi'iré wa'thé nalama'atajiko puraka'aloji é.*

*Namajika neka napura'ako e rijapaje ritejena inau'ke wa'thé rithe'eré é.*

## **WE'ECHÚKA'ALA INA JAPAKALOJE**

*Pha'jluaja kua'takele inau'ké (6) japajeño kele na pura'akaro nakú we'emakana eyá eja'awá pi'irena wa'thé re we'echúkala ri penaje.*

*Najapaje iyamathé'ekele jarechí meka na pura'akó rejomi na japakalójé tapuiyana narutena nakú eyá phiyukeja inau'ké.*

*Na japaje naña'aka loje leñeru penaje*

*Iyama we'emakana jpajeño riká liñeru aúa'aná rithánajiko jená nokakajo unká jika é ripha we'emakana kulaje liñeru apú ewa.*

## **WE'EMAKANA PHUYUKEJA COLOMBIA EYÁJENA A'AJEÑO LIÑERU PURA'AKAJO I'IMAKALOJE RICHUWANO**

*Ajópana a'ajeño liñeru we'emakana kemajikaké, karú le'ejena liñeru, we'emakana wa'thé japajeño eyá tapuiyana unká na'alaje liñeru.*

*Re ininau'ke i'imajeño namájeño liñeru nata'á riká.*



**Acuerdo  
de  
Paz**

## **INAU'KÉ KA'AJÍKA WAKAJÉ NA WE'EPEJE E KA'ANÁ KEWAKA WE'EMAKANA EJAWA PI'IREJENA KEMAKÁ**

*Rimaje 23 de junio de 2016 we'emakana eyá eja'awa pi'irena kemakare naku nephaka loje ina'uké kemakare nakú wemakaloje kewaka unká ka'anó.*

*Eyá 18 nakari julio de 2016 phiyukeja ne'emakanana japaño nekawaruna ñakaréyu kemajeño palani puràka'aloji nemakare nakú.*

*Eyá Senado chiajena neká kemajeño palani chuata ika'a we'emakaloje pala jupi, eyá inau'ké ka'ajika é unkajlo é unká marí nokakajo na`nálajo eyá chapu inau'ké la'aje.*

## **MAÁREJÉ RIYUKUNA TA'ANÓ**

*Weká lana'año marí papera wa pura'ako chú, i'inathakaloje ipechua phiyuke weká'ana.*

**WAPIRAMI:** Ricardo Yucuna Yucuna  
**PHICHÍ:** Erminda Rodríguez Yucuna  
**YUI'ITURU:** Juana del Pilar Rivas Rodríguez

*A'arí nañathé i'imaka*

**PAWEKO:** Cesar Fernando Castillo Rodríguez  
**WAPAYA'A:** Eduardo Rodríguez Macuna



**Acuerdo  
de  
Paz**